

ētahi kāore e whaihua ana ki a rātou ēnei hui i te mea kua mātau kē ki ngā āhuatanga reo e tirohia ana. Kāore te Taura Whiri e mōhio mēnā e hāngai ana ēnei whakapae, kei tawhiti noa atu rānei, engari ko te hua o te noho tonu ki tēnei tokoiti o te hunga whakaako e whakauru mai ana ki ēnei kura, ehara, e mōhiotia ana tērā. Ki te kore e nui ake ngā kaiwhakaako, kua raru te kirimana, ā, kua kore e whakatūhia anō e te Taura Whiri tētahi kura whakapakari reo.

Tērā pea e tika ana kia mutu tā te Taura Whiri whakatū kura pēnei, i te mea kua kore pea i tino hāngai ki ngā hiahia o te ao whakaako ki te reo Māori. Engari mō te tūpono ko te kore rongo kōrero kē tētahi o ngā take nui i kore ai e pokea te hui tuatahi, koinā kē e pānuihia nei i konei ngā rā e tū ai te tuarua me te tuatoru o ngā kura kua whakaritea mō tēnei tau.

Ko te tūmanako, e whaihua tonu ana ēnei kura ki ētahi o koutou, ngā kaiwhakaako kura tuatahi, kura tuarua. Ko tātou katoa e mōhio ana nā koutou te mahi nui e kōrero Māori ai ā tātou tamariki, mokopuna, ā, nei noa rā tā te Taura Whiri hei paku tautoko i te kaupapa.

(Ki te hiahiatia te roanga atu o ngā kōrero e pā ana ki ēnei kura, waea mai ki te Taura Whiri (04 4710 244).)

He inoi ki te hunga e haere mai ana ki te hui ki Hirangi (i Tūrangi - ā te 30 o Pipiri ki te 5 o Hōngongoi)

Mēnā kua oti i a koe te whakatau e tino haere mai ana koe, tēnā koa patua mai he kōrero ki tō mātou tari, kia pai ai ngā whakariterite i tēnei pito. Me tae mai he kupu whakamōhio i mua i te **15 o Pipiri**, engari mēnā ka taea te whakauru mai i mua noa mai i tērā, ko te painga atu tērā ki a mātou.

E wātea ana anō hoki tēnei kura ki te hunga kōrero Māori whānui e whai ana kia whānui ake tō rātou matatau ki te reo Māori. Mēnā ehara koe i te kaiwhakaako kura tuatahi, kura tuarua, kotahi rau tāra te utu whakauru mai. Karekau ana he utu ki ngā kaiwhakaako o ngā kura tuatahi me ngā kura tuarua.

Engari kua kitea he raruraru e tika ana kia kōrerohia i konei me kore e taea te whakatika. Kei te āhua tokomaha tonu ngā tāngata e kī mai ana āe, kei te haere atu ki te kura, engari taka rawa mai ki te whakaeke marae, kua kitea atu kāore tonu ērā i tae ki te hui. Tērā pea e whakaaro ana ētahi o tātou ko te Tāhuhu kē e pīkau ana i ngā utu o te hui, ā, i runga i tēnei, kāore he raruraru ki te Taura Whiri ki te kore ētahi e puta atu. Engari ka raruraru tonu mātou. Tuatahi, kāore e eke te tokomaha o ngā kaiwhakaako ki tērā kua kīia atu ki te Tāhuhu ka tae mai. Tuarua, nā te nui o ngā tono whakauru mai, kua pōhēhē te Taura Whiri kua neke noa atu i te 50 tāngata, ā, i runga i tēnei kua kore i whaiwhai haere i ētahi atu kaiwhakaako e whakaaro ana ki te haere mai.

Heoi anō, e whakaaro noa ake ana me kōrero tēnei āhuatanga kia mōhio noa ai ngā kaiwhakaako ka raru tonu te Taura Whiri i te hunga kī taurangi mai, āe, kei te haere atu, engari tae rawa ki te hui, āhāhā - kua noho taurangi tonu ēnā kupu, kāore noa i whakatinanahia. ***Kia mahara! He hui kōrero Māori ēnei, me māori te reo i ngā wā katoa, i ngā wāhi katoa!***

Te Tau o te Reo Māori

He maha tonu ngā whakaaro i whāia e tēnā, e tēnā hei whakanui i te Tau o te Reo Māori. Ko te nuinga, nā te ringa Māori i poipoi, i hāpai, engari arā anō ētahi nā iwi kē i kōkiri. Ahakoa nō wai te whakaaro, ahakoa pēhea te kaha noho mai o te reo Māori ki te tahiwi o te whakaaro, anō te pai o tā tātou takahi i te ara whānui kotahi e kaha ake ai tō tātou reo Māori.

Otiā, kia kaua e tukua e tātou ngā mahi o tērā tau kia noho tāwewē mai i te rokiroki o mahara. Arā kē te mahi mā tātou, ko te whai kia rere tonu ngā aho i herea atu ki te Tau, e tauhere tonu ai te reo ki ngā kōtihi, ki ngā whārua, ki ngā raora o te ao Māori i ngā tau katoa, haere ake nei.

Waihoki, ko te tikanga he māmā ake te whai kia rere tonu ngā aho kua mārō kē te haere, tēnā i te waiho kia ngoru noa, ā, nāwai rā, kua whakaaro ake me karawhiu anō. Kei tūpono ā te wā e tahuri anō ai tātou ki te hiki i ēnei kaupapa, kua whiwhiwhi katoa ngā aho, kua mate tātou ki te noho ki te hanga aho hou, ki te whakamatara rānei i ngā mea tawhito. E tama, hōhā ana tērā. Koinei māua ko pukumahara e whakaaro nei he pai noa ake te ū pūmau kia rere tonu ā tātou kaupapa whakatairanga reo Māori i tukuna kia kawea e ngā hau o tērā tau, tē waiho ai kia pae noa i te koko o mahara.

Hei whakatepe noa ake i ēnei kupu ruarua nei mō te Tau o te Reo Māori, e kore e mimiti te puna whakamihi a te Taura Whiri mō te āhua ki tā koutou tautoko mai i tēnei kaupapa. Ahakoa nā tātou katoa te kaupapa, nā koutou i haere ai mō te roanga atu o te tau, nā koutou anō i tāoro ai i te nuku o te whenua, i mōhiotia anō ai hoki he kaupapa tēnei nā te iwi Māori whānui. Rangatira ana te Taura Whiri i a koutou.

**HE TAONGA
TE REO**